



ШЫБН

НИИТИЛЕЛ-ПОЛИТИКТИГ СОЛУН

1925 чылдың
август 31-де үнүп
эгелээн

№ 53 (17190)

2006 чылдың
МАЙ 20,
суббота

Номерни парлалгаже
дужааганы:
график езугаар – 21.00,
херек кырында – 16.00
Садар өртээ – 5 рубль.

Национал төлевилел

АЖЫЛ ХӨЙ БОЛУР – ЭКИ-ДИР

Апрельдин сөөлгү ол ийи хүнү Шуурмакка чуттуг-ла болган. Хондур, хүнзедир хар чагган, машиналар арт кырынга тайгактап, чамдыкта «тепкиленип» үнүп тургулаан. Мурнунда эрий берген чыткан асфальт шывыгылык оруктун чамдык черлери кылама дош дег апарган.

— Тайгада эрлерге-ле түреничиг-дир, хинчектиг чүве-ле болгай,

Шевеги кылдыр чыып каан бажың ханазынга баар брус ыяштарда кемниг чүве билдиртпес болду. Ол хүн бригадир Коданмай Маадыр Кызыл кирген, чок, ооң «дайынчы оралакчызы» Эраст Балданай-биле чугаалажып олур бис.

— Ыяш ужуруп, оларны алдылды метр кылдыр кестиргеш чорудуп турар беш оол бар. «Зил» машиналыг, ДТ-55-тиг, чүдүрер тракторлуг...

Ажыл мындыг янзылыг чоруп турар. Бензин-биле ажылдаар хирээлиг кижиги ыяшты ужурап, оозу аай-баштыг дүшсүн дээш, өөрү дузалажыр. Будуктары кезип арыглааш, тракторга трост-биле кожар. Дытты тускай шөлчүгешке эккээрге, бир кижиги стандарт езугаар алды метр кылдыр одура кестирер. Ыяш сөөртүр машина чүүгү хире чеде бээрге, тускай херекселдиг трактор-биле ыяштарны бөле-хаара кедүрткеш чүдүрүп каарга, борта, пилорамага, эккээр.

Үш-үш кижиги «экипажтыг» ийи пилорама шийкижырткайндир ажылдап эгелээр. Брус чудуктан артып калган хыртыңны одаар ыяш кылдыр доорап турар ийи ажылчын база бар. Олар шаараш херим кылыр штакетниктерни база станокка белеткеп «эрттирип» турар болду. Чугаа-выс аразында хыртың алыр дээр машиналыг улус келгеш, Эраст Домбуевич-биле туда санаашкаш, квантициязын ал-сал-ла, оозун чүдүрер дээш үнүптүлөр.

— Бодум рамщик мен, бригадир чокта ажыл аайлап-башкарап, продукция дээр санажыр кижиги-дир мен – деп, ол чугаалап

кагды. – Болар бистин Тес-Хем оолдары-дыр, бир күдээвис бар. Сөөлгү үеде Эрзинниң кайы-даа сумуларындан улус кээп садыглажып тур, колдуу хуу улус болур, үениң байдалы ынчап барган: тудуг-суур кылып турар кижилер көвүдөп орат. Самагалдайдан военкомат элээн материал ап тур. Ам бо туда акшалыг уругну көрдүрер: элээн брус, манза хереклээн, дөрт муң чедир акша төлээр. А чогуу чаңгыс чудук, ийи-үш манза-даа болза садып-ла тур бис.

Дараазында чугаавыс элээн хөй киржикчилиг апарды. Ол черниң ийи-үш оолдарындан аңгыда чолаачывыс Виктор Монгушович, фотокорреспондент черле бирээни бодап алганнар боор, хөй-ле айтырылгар салып, санап ордулар. Билдили аажоктар, ындамында тудуг материалдарын кандыг өртөккө садып-саарып турарын ыяк билдилер хире.

Кожуунда моон аңгыда чүглө Шуурмакта арга-арыг ажыл-агый черинде ыяш дилдирип турар. А бо оолдар бажың тударынга херек бүгү материалдарны кылып турарлар: бажың ханазы болур 18х18 см брус, оон аңгыда 10х18 см хемчээлдиг чиңгежээн база ийи-үш янзы манзалар. Бо чылын ыяш өртээ элээн улгаткан, бир кубометрнин 3,2 муң рубль, а ол дээрге 5 чоон брус чудук чүведир. А ийи квартиралыг бажыңга 120 кубометр чедер. «А чаңгыс квартира, аңгы бажың болза?» «Чунар-бажың тудар болза?» Ынча дижип алгаш, санап көрдүрер-даа. Мээң билгеним: чамдык черлерниң белен кылдыр эптеп каан бажыңчыгаштарының өртээ моон садып, боду кылганы-биле кол нуруузунда дөмей хире.

— Бо чылын кылыр ажылывыс четчир болгаш артар – деп, ыяш дилдирикчилери, тудугчулар өөрүп турар болдулар. – Маана, Белдир-Арыгга, «Чодураага» үш бажың туттунар, өске черлерге он шаа. Чээли ап шыдаптар болза, «Чодураа» КУБ хымыс фермазын тургузар. Ажыл хөй болур – эки-дир. (Бо дугайын суму чагыргазының даргазы Лина Балдан база чугаалап орду).

(Уланчызы 2-ги арында).




Ыяш сөөртүр машина чолаачызы Мерген Коданмай, тракторист Менди Коданмай.

өл хар деп чүве: арын-башты-даа шыва шаап турар, идик-хеп-даа өл шылба. Тайып ухар-даа сен, харын-даа озал-ондак мыя – моторлуг хирээ, машина-трактор-биле ажылдап турар улуска...

Тайылбыр хевирлиг мындыг янзылыг чугааларны бо ыяш дилдирер черге дыңнадывыс. «Тайгада оолдарның чүдүрүп чорудупкан чудук ыяштарын дилдирип турар чер бо: ийи пилорама, он шаа кижиги. Олар бөгүн эртенден тура ажылдаар черде чыылган бокту арыглап, хамык чүвени эмгелеп турганнар. Маана, Белдир-Арыгга, хар шоолуг чагбаан, ынчалза-даа бораң, өл-шык. Дилдирип каан ыяштар, хыртыңнар аяңны сүргей айдызап чыдар. Мында бүдүрүлгө чугаазы-биле «төнчү продукция» дээр белен тудуг ыяжын бүдүрүп турар. А тайгада...

— Шуурмакта Сайлыг-Хем унунда Сорулуг ынчаар ыяш кезер черлиг бис. Чогуу бодум тудугжу кижиги мен – деп, аңаа турган аныяк оолдарның бирээзи чугаалады. — Өрттенип турган чер-дир ийин. Даштын көөрүңге, анаа дыттар турар, ужурагынга, дең кезинин ишти хос, ирик болур – он ыяш болза, дөрт-бежи. Ам харын оолдар ындыг ыяшты баш удур элээн билдир апарган.



Ыяш дилдирикчилери: Аян Аралдин биле Шолбан Бадарчы.

Кажан? Кая? Чүү?

ЧЭЭЛИ БЭЭРИ КӨВҮДЭЭР

«Агроулетпур комплекзин хөгжүдөр» национал төлөвилелди күүседир дээр республиканың барыын талазында Мөңгүн-Тайга, Бай-Тайга, Барын-Хемчик, Сүт-Хөл, Чөөн-Хемчик, Өвүр, Чаа-Хөл кожууннар, Ак-Довурак хоорай тодаргай хемчеглерни ап турар.

Оларның хуу дузалал болгаш тараачын (фермер) ажыл-агыйлары мал болгаш техника садып алыры-биле банкыдан чээли дилээн 600 ажыл билдиришкенин кирген. 150 хире ажыл-агый чээли алыр документилерни белеткээрин доозуп турар. Май 1-ниң медээзин езугаар алырга, үстүндө адаан кожууннарның 12 хуу дузалал болгаш тараачын ажыл-агыйлары 2 миллион 480 муң рубльдин чээлин элган. Оон аңгыда «Россельхозбанкның» салбырының чээли комиссиясы 11 хуу дузалал ажыл-агыйга 2 млн. 860 муң рубльдин чээлин бээр шийтирени хүлээп алган.

«Россельхозбанкның» Тывада девискээр салбыры Бай-Тайга, Сүт-Хөл, Чөөн-Хемчик, Сүт-Хөл кожууннарда бодунун төлээ черлерин организастан, оларны өске кожууннарга база тургузар. Ынчангаш көдээниң ишчилеринге чээли алырынга таарымчалыг байдал тургустунар.

Бистин корр. КЫДАТТАН ААЛЧЫЛАР КЕЛИР

2006 чылды Кыдатка Россияның чылы кылдыр чарлаан.

Бо чылдың февраль айда Тыва Республиканың Чазааның, Кызыл хоорайның мэриязының делегациясы, Бурят Республиканың, Чита областың, Краснокаменск хоорайның төлээлери Кыдаттың Маньчжурия хоорайга ооң байырлыг ажыдышкынының езуалыгына киришкен. Февраль 14-те Кызыл хоорайның чагыргазы биле Иштики Моол Автономнуг районунун чанында Маньчжурия хоорай чагыргазының аразында бот-боттарынга ажыктыг садыг-экономиктиг, эртем-техниктиг болгаш культурлуг кады ажылдажылга дугайында протоколга ат салган. Ынчан Кызыл хоорайның Төлээлекчилер хуралының даргазы

Юрий Ананьин Маньчжурияның чазак делегациязын Тываже чалаан.

Тыва Республиканың Чазааның болгаш Кызыл хоорайның мэриязының чалааны-биле Кыдаттың Иштики Моол Автономнуг районунун делегациясы май 20-де республиканың найысылалынга чедип келир. Делегацияны Иштики Моолдун Автономнуг районунун Чазааның садыг эргелелиниң начальниги Люй Эршань баштап чоруур.

Кыдат делегация үш хүннүң дургузунда даштыкы экономиктиг харылзаалар болгаш туризм, садыг, амьдырал хандырылга болгаш сайгарлыкчы чорукту хөгжүдөр яамыларга, хөрөнгиттерниң төлээлери-биле элээн каш албанарыг ужуражылгаларын эрттирер. Кызыл хоорайның тураскаалдыг черлери-биле таныжар, күрүне лицейинге, Алдан-маадыр аттыг национал чурт-шинчилел музейинге болгаш өске-даа социал-экономиктиг объектилерге баар.

Май 21-де хоорайның мэриязынга Кыдаттан келген делегация-биле ужуражылга болур, аңаа ийи хоорайның төлээ черлерин ажыдар дугайында чугааны кылыр.

СӨӨЛГҮ КОҢГА

Кызыл хоорайның школаларының 2765 үстүкү класстарының өөреникчилеринин сөөлгү коңгазы бөгүн, май 20-де болур.

Бүгү школаларга байырлал эртенгиниң 10 шакта эгелээр. Бо чылын он бирги классты 917 кижиги, тоску классты 1798 өөреникчи доозар. Эрткен чылын Кызылдың школаларын дараалаштыр 1099 болгаш 1774 кижиги дооскан.

Хоорай олимпиадаларының, конкурстарының, эртем-практиктиг конференцияларының тиелекчилеринге, ол ышкаш тилекчи өөреникчилерни белеткээн эртем башкыларынга шаңналдарны тыпсыр.

Школалар доозукчуларынга Совет Тыванын 5 чылы аттыг стадионга дискотеканы 18 шактан 22 шакка чедир организастан. Доозукчуларның нурумун хайгаараары-биле хоорайның өөредилге комитетинин ажылдакчылары шагдаалар-биле кадый реидилерни хоорайга эрттирер, хоорай кыдыынче үнүп походтаарын хораан.

Айдыс СУНДУЙ.

Тээлинин ортумак ниити өөредилге школазының башкыларын шаңнаар дугайында ТЫВА РЕСПУБЛИКАНЫҢ ЧАЗАК ДАРГАЗЫНЫҢ ЧАРЛЫЫ

«Тыва Республиканың өөредилгезинин алдарлыг ажылдакчызы» хүндүлүг атты

өөредилге талазы-биле ачы-хавыязы болгаш хөй чылдарда ак сеткилдиг ажылы дээр Бай-Тайга кожуунун Тээли ортумак школазының башкызы Антонина Сендажиевна ДОНГАККА тыпсыр.

Тыва Республиканың Чазак Даргазының Хүндүлел бижин-биле

Бай-Тайга кожуунун Тээли ортумак школазының башкылары Марина Окпан-ооловна САЛЧАКТЫ болгаш Елена Көк-ооловна ШОЖУНЧАПТЫ шаңнаар.

Тыва Республиканың Чазак Даргазы Ш. ООРЖАК.

